

Započela partnerska saradnja na unapređenju politika za kulturne i kreativne industrije u okviru projekta PROSPERO

22.07.2025.

Projekat „**Kultura i kreativnost pokreću prosperitetni razvoj – PROSPERO**“ zvanično je započeo prvim interregionalnim sastankom, održanim 28. i 29. maja 2025. godine u Mentani (Italija), u organizaciji vodećeg partnera – Gradskog vijeća Mentane.

Događaj je označio početak četverogodišnje saradnje između devet partnera iz osam evropskih zemalja, a okupio je predstavnike iz Italije, Rumunije, Mađarske, Danske, Finske, Irske, Belgije i Bosne i Hercegovine, koju u projektu predstavljaju **Ministarstvo kulture i sporta Kantona Sarajevo i Sarajevska regionalna razvojna agencija SERDA**.



Tokom dvodnevnog programa, partneri su učestvovali u radionicama, diskusijama i studijskim posjetama, razmjenjujući iskustva i dobre prakse u unapređenju javnih politika koje uključuju kulturne i kreativne industrije kao alat za jačanje regionalnog razvoja. Poseban naglasak bio je na identifikaciji pristupa koji omogućavaju njihovo dugoročno uključivanje u strateško planiranje i društveno-ekonomski napredak. Terenski dio programa obuhvatio je posjete Arheološkom muzeju MUCAM, starom gradu Mentane, muzeju MuGa, spomen-obilježju Bitke kod Mentane i javnoj

biblioteci. Partneri su imali priliku upoznati lokalne inicijative koje povezuju kulturnu baštinu sa razvojem zajednice, turizma, obrazovanja i poduzetništva.

Fotografije regija: zajedničko učenje kroz primjere dobrih praksi

Jedan od ključnih elemenata projekta je tzv. „**fotografija regije**“, koja pruža sveobuhvatan uvid u trenutno stanje, izazove i potencijale kulturnih i kreativnih industrija svake regije. Ovaj pristup omogućava usporednu analizu, razmjenu znanja i izradu konkretnih prijedloga za unapređenje postojećih javnih politika. U narednim fazama projekta, svaki partner će predstaviti svoju regiju, otvarajući prostor za dijalog među partnerima i članovima lokalne radne grupe.

O projektu

PROSPERO se realizuje u okviru programa **Interreg Europe 2021-2027**, s ciljem unapređenja instrumenata javnih politika koji prepoznaju kulturne i kreativne industrije kao nosioce održivog, pametnog i inkluzivnog razvoja. Kroz međuregionalnu saradnju i razmjenu dobrih praksi, projekat doprinosi jačanju kapaciteta javnih institucija i kreiranju učinkovitijih politika za razvoj KKI sektora i lokalnih zajednica. Ukupna vrijednost projekta iznosi 1.766.451,00 EUR, a implementacija traje do 31. jula 2029. godine.